

登西臺慟哭記

謝翱

始故人唐宰相魯公開府南服余以布衣從戎明年別公章水
湄後明年公以事過張睢陽及顏杲卿所嘗往來處悲歌慷慨
卒不負其言而從之游今其詩具在可考也余恨死無以藉手
見公而獨記別時語每一動念卽於夢中尋之或山水池榭雲
嵐草木與所別之處及其時遠相類則徘徊顧盼悲不敢泣又
後三年過姑蘇姑蘇公初開府舊治也望夫差之臺而始哭公
焉又後四年而哭之於越臺又後五年及今而哭於子陵之臺
先是一日與友人甲乙若丙約越宿而集午雨未止買榜江涘
登岸謁子陵祠憇祠傍僧舍毀垣枯甃如入墟墓還與榜人治
道藏輯要 天下名山記 浙江西臺謝 奎 軫集二 卷三十一
祭具須臾雨止登西臺設主於荒亭隅再拜跪伏祝畢號而慟
者三復再拜起又念予弱冠時往來必謁拜祠下其始至也侍
先君焉今余且老江山人物睽焉若失復東望泣拜不已有雲
從南來滄滄淖鬱氣薄林木若相助以悲者乃以竹如意擊石
作楚歌招之曰魂朝往兮何極暮來歸兮關水黑化爲朱鳥兮
有味焉食歌闋竹石俱碎於是相向感喑復登東臺撫蒼石還
憇於榜中榜人始驚余哭云適有邏舟之過也盍移諸遂移榜
中流舉酒相屬各爲詩以寄所思薄暮雪作風凜不可留登岸
宿乙家夜復賦詩懷古明日益風雪別甲於江余與丙獨歸行
三十里又越宿乃至其後甲以書及別詩來言是日風帆怒駛

逾久而後濟既濟疑有神陰相以著茲遊之偉余曰嗚呼阮步
兵死空山無哭聲且千年矣若神之助固不可知然茲遊亦良
偉其爲文辭因以達意亦誠可悲已余嘗欲倣太史公著季漢
月表如秦楚之際今人不有知余心後之人必有知余者於此
宜得書故紀之以附季漢事後時先君登臺廿六年也先君諱
某字某登臺之歲在乙丑云

道藏輯要

天下名山記
浙江西臺謝

卷

軫集二
181